



INYANDIKO NSOBANURAMPAMVU

UMUNSI MPUZAMAHANGA W'IBIDUKIKIJE N'ICYUMWERU CYAHARIWE KUBUNGABUNGA IBIDUKIKIJE MU RWANDA

25 Gicurasi-5 Kamena 2013

Insanganyamatsiko: "Tekereza, Urye unibuka Kuzigama."

1. Intangiriro

Umunsi Mpuzamahanga w'Ibidukikije wizihizwa buri mwaka tariki ya 05 Kamena . Uwo munsi washyizweho n' Umuryango w' Abibumbye mu mwaka wa 1972, akaba ari imwe mu nzira uwo muryango wifashisha mu gushishikariza isi yose cyane cyane abafata ibyemezo kwitabira ibikorwa bigamije kurengera ibidukikije no guhangana n'imihindagurikire y'ibihe.

Buri mwaka, u Rwanda rwizihiza Umunsi Mpuzamahanga w'Ibidukikije, ukabanzirizwa n'Icyumweru Cyahariwe Kwita ku Bidukikije mu Rwanda. Umunsi Mpuzamahanga w'Ibidukikije ni uburyo kandi bwo gushimangira intambwe twataye mu kurengera ibidukikije no guhangana n'imihindagurikire y'ibihe ndetse no mu mwaka wa 2010, u Rwanda rwakiriye ku rwego rw'isi Umunsi Mpuzamahanga w'Ibidukikije .

Ku rwego rw'isi, tariki ya 5 Kamena 2013 Umunsi Mpuzamahanga w'Ibidukikije uzizihirizwa mu gihugu cya "Mongolia", kimwe mu bihugu bigaragaza umuvuduko mu iterambere kandi kikaba cyibasiwe n'imihindagurikire y'ibihe .

2. Kwizihiza Umunsi Mpuzamahanga w'Ibidukikije mu Rwanda

Muri uyu mwaka wa 2013, mu Rwanda tuzizihiza ku nshuro ya 20 Icyumweru Cyahariwe Kwita ku Bidukikije naho Umunsi Mpuzamahanga w'Ibidukikije wizihizwe ku nshuro ya 41 ku rwego rw'isi. Kuri uwo munsi, Ikigo cy'Igihugu cyo Kubungabunga Ibidukikije (REMA) kizaboneraho gutanga ibihembo ku bantu batsindiye "Igihembo cy'indashyikirwa mu kwita ku bidukikije mu mwaka wa 2012-2013" kigenewe Uturere, amashyirahamwe akorera mu baturage (CBOs)/ amakoperative n'abanyamakuru.

3. Insanganyamatsiko y' Umunsi Mpuzamahanga w'Ibidukikije wa 2013

Insanganyamatsiko y' Umunsi Mpuzamahanga w'Ibidukikije wa 2013 igira iti **"Think.Eat.Save/ Pensez.Mangez.Preservez / Tekereza, Urye unibuka Kuzigama."** Iyi nsanganyamatsiko igamije gukangurira abantu bose (abafata ibyemezo, abatunganya umusaruro , abaguzi, abacuruzi, ..)

kwita ku kibazo cy'isesagura ry'ibiribwa n'ingaruka zaryo ku iterambere ry'ubukungu n'ibidukikije.

Intego y'ibanze y'iyi nsanganyamatsiko ni ugushimangira ko tubona umusaruro ku buryo burambye kandi tukawukoresha neza tugabanya isesagura ry'ibiribwa twirinda n'ibikorwa biganisha kuri iryo sesagura.

Ingingo ya mbere y'iyi nsanganyamatsiko (**Think / Tekereza**) irashishikariza abantu kuzirikana uruhare rw'ibidukikije kugira ngo haboneke umusaruro uvamo ibidutunga, n'ingaruka isesagura ry'ibiribwa rigira ku bidukikije, bityo bagaharanira kubibungabunga kandi bahangana n'ingaruka z'imihindagurikire y'ibihe.

Mu miryango, ingo nyinshi n'amahoteli usanga hategurwa ibiryo byinshi kurusha ibyo bakeneye. Ku rwego rw'isi, buri mwaka hasesagurwa igice kinini cy'umusaruro w'ibiribwa (hafi toni miliyari 1,3) mugihe buri muni hapfa abana barenze ibihumbi makumyabiri (20.000) bishwe n'inzara n'imirire mibi. Gusesagura ibiribwa bigira ingaruka mbi ku bidukikije, haba kwiyongera kw'ibyuka bihumanya ikirere no kugabanuka k'urusobe rw'ibinyabuzima. Gusesagura ibiribwa ni ugusesagura umutungo kamere wose uba wakoreshejwe (amazi, ingufu, n'ibindi) kugira ngo ibyo biribwa biboneke.

Ingingo ya kabiri y'iyi nsanganyamatsiko (**Eat /Urye**) irashishikariza abantu kumenya guhitamo neza amafunguro atuma bagira ubuzima bwiza.

Ingingo ya gatatu y'iyi nsanganyamatsiko (**Save /unibuke Kuzigama**) irahamagarira abantu kugabanya isesagura ry'amafunguro bakagira imyitwarire n'imibereho ijyanye no gukoresha umusaruro ku buryo burambye, nk'uko biri mu ihame ryo kugabanya ibyo dukoresha (Reduce), gukoresha ibintu byisubiranywa (Reuse), gutunganya imyanda tukayibazamo ibindi bikoreshe bidufitiye akamaro (Recycle).

4. Ibikorwa biteganyijwe

Ibikorwa bijyanye n'insanganyamatsiko y'uyu mwaka bazarushaho gushimangirwa mu Cyumweru Cyahariwe Kwita ku Bidukikije kuva **tariki ya 25 Gicurasi kugeza tariki ya 5 Kamena 2013**. Icyo cyumweru kizizihizwa mu Turere twose tw'u Rwanda. Ingero zikurikira zirerekana bimwe muri ibyo bikorwa bigamije kugabanya isesagura ry'ibiribwa:

A. Ibikorwa bigamije kugabanya ingaruka ku bidukikije no guhangana n'imihindagurikire y'ibihe bitewe no kwangiza umusaruro w'ibiribwa

- Gukangurira abantu no kubashishikariza gukoresha neza umutungo kamere kugira ngo bagire umusaruro ku buryo burambye.
 - Gukoresha neza amazi (gufata amazi y'imvura, gusukura neza amazi tunywa n'ayo dukoresha mu rugo, kuba twakongeraga tukayakoresha mu bindi (recycle and reuse) gufata neza ahantu h'amaneguka, ibiyaga, imigezi n'ibishanga)

- Gukoresha ingufu zitabangamira ibidukikije (Biogas, amashyiga arondereza ibicanwa, ingufu z'imirasire y'izuba)
- Gutera ibiti by'imbuto n'ibivangwa n'imyaka
- Ibikorwa bijyanye no guhangana n'imihindagurikire y'ibihe "adaptation to effects of climate change" muri gahunda zose z'iterambere ry'ubukungu .
- Gukora ubugenzuzi ku buryo imyanda ikusanywa no gusesengura isesagura ry'umusaruro w'ibiribwa mu masoko (markets & supermarkets) , amahoteli, amaresitora (restaurants), gereza, amashuri no mu ngo (households).
- Gukusanya no gutunganya imyanda yo mu rugo no mu bigo, kuyitandukanya "sorting" no kuyibazamo ibindi bintu bidufitiye akamaro

B. Ibikorwa bigamiye kugabanya ingaruka ku bidukikije no kubuzima bw'abantu bitewe no kurya nabi

- Gukangurira abantu no kubashishikariza uburyo babaho neza bitewe n'uko barya, uko bategura ibiribwa, uko bahaha n'uko babika ibiribwa bahashye.
- Gukora akarima k'igikoni mu mashuri, gereza no mu ngo.
- Kugabanya isesagura ry'ibiribwa hakoreshwa uburyo bugezweho bwo guhunika umusaruro w'imbuto, imboga, ibinyabijumba, ibigori n'amata.
- Gushishikariza abantu gushora imari mu gutunganya ibiribwa no kubihunika.
- Gushyigikira ko mu masoko manini (supermarkets) ibiribwa bicuruzwa bishyirwaho indango zihuye (standardized labelling) kandi ibigiye kurangiza igihe (near-expiration) bikagabanyirizwa igiciro cyangwa bigatangirwa ubuntu.
- Kongera imfashanyo y'ibiribwa ifashishwa abatishoboye.

Ku rwego rw'Igihugu, Icyumweru Cyahariwe Kwita ku Bidukikije kizatanzwe tariki ya 25 Gicurasi 2013 hakorwa Umuganda Rusange. Icyo cyumweru kizasozwe tariki ya 5 Kamena 2013 twizihiza Umunsi Mpuzamahanga w'Ibidukikije mu mujyi wa Kigali. Kuri uwo munsi hazatangwa ibihembo ku bantu batsindiye "Igihembo cy'Indashyikirwa mu Kwita ku Bidukikije mu mwaka wa 2012-2013".

Abo iki gikorwa kireba.

Kwizihiza Umunsi Mpuzamahanga w'Ibidukikije n'Icyumweru Cyahariwe Kwita ku Bidukikije mu Rwanda byateguwe na REMA kandi bizizihizwa mu Turere twose tw'Igihugu cyacu. Iki gikorwa gihuriweho na Minisiteri zose n'ibigo bya Leta, abikorera ku giti cyabo, amashyirahamwe nyarwanda n'imiryango mpuzamahanga, amashuri, za kaminuza ndetse n'itangazamakuru. Bityo ibikorwa by'Icyumweru cyahariwe Kwita ku Bidukikije mu Rwanda bireba buri mutururwanda wese n'abafatanyabikorwa bose .



ICYUMWERU CYAHARIWE KUBUNGABUNGA IBIDUKIKIJE N'UMUNSI MPUZAMAHANGA W'IBIDUKIKIJE (WED) MU RWANDA

Gahunda y'ibikorwa biteganyijwe

Hateganyijwe ibikorwa bikurikira:

Kuva tariki ya 14 kugeza tariki ya 31 Gicurasi 2013

Ibiganiro mu Mashuri Makuru (Public lectures in Higher learning Institutions) ku nsanganyamatsiko ya WED 2013 n'ibikorwa by' Icyumweru cyahariwe Kwita ku Bidukikije mu Rwanda.

Aho bizabera: Amashuri makuru na Kaminuza zitandukanye (tariki ya 14-31 Gicurasi 2013)

Tariki ya 23 Gicurasi 2013

Ikiganiro mbwirwaruhame ku banyamakuru mu kumenyekanisha insanganyamatsiko ya WED 2013 n'ibikorwa by' Icyumweru Cyahariwe Kwita ku Bidukikije mu Rwanda.

Aho bizabera: Icyumba cy'inama cya MINIRENA ku Gishushu, Umujyi wa Kigali.

Minisiteri n'ibigo bizagiramo uruhare: MINIRENA, MINAGRI, REMA.

Tariki ya 24 Gicurasi 2013

Ibiganiro kuri Radiyo bigamije kumenyekanisha no kungurana ibitekerezo ku nsanganyamatsiko ya WED 2013 n'ibikorwa by' Icyumweru Cyahariwe Kwita ku Bidukikije mu Rwanda.

Aho bizabera: Radio Rwanda n'andi maradiyo yigenga.

Tariki ya 25 Gicurasi 2013

Umuganda rusange no gutangiza ku rwego rw'Igihugu Icyumweru Cyahariwe Kwita ku Bidukikije mu Rwanda n'Umunsi Mpuzamahanga w'Ibidukikije

Aho bizabera: Akarere ka Nyarugenge, Umurenge wa Kigali, hafi y'Uruganda rwa Ruliba. Hazakorwa imirwanyasuri kuri uwo musozi.

Kuva tariki ya 29 kugeza tariki ya 30 Gicurasi 2013

Gahunda y'ubugenzuzi ku biribwa muri za hoteli, amaresitora (Restaurants) n'amasoko manini

Aho bizabera: Umujyi wa Kigali no mu Turere twose.

Kwizihiza Umunsi Mpuzamahanga w'Ibidukikije tariki ya 5 Kamena 2013

- ✓ Ibikorwa byateganyijwe na buri Karere
- ✓ Kwizihiza Umunsi Mpuzamahanga w'Ibidukikije REMA itanga ibihembo ku bantu batsindiye "Igihembo cy'Indashyikirwa mu Kwita ku Bidukikije mu mwaka wa 2012-2013" kigenewe Uturere, amashyirahamwe akorera mu baturage (CBOs), amakoperative n'abanyamakuru.

Aho bizabera: Sports View Hotel.

Ku bindi bisobanuro reba kuri www.rema.gov.rw cyangwa www.unep.org/wed